



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Distritu Liquica

28 Jullu 2014

Komunidade Suku Dato-Distritu Liquica menus informasaun kona-ba lei no justisa

Iha 23 Jullu 2014, *Judicial System Monitoring Programme* (JSMP), liu husi Unidade Peskizador Juridiku no Relasaun Publiku (*Outreach*) fasilita treinamentu ba lideransan komunitáriu no comunidade sira iha Suku Dato, Distritu Liquica.

Partisipante sira hosi treinamentu ne'e kompostu husi estrutura suku sira ne'ebé inklui xefe aldeia, feto rua, no joventude feto no mane. Partisipante sira hamutuk ema nain 30, ne'ebé konsiste hosi mane nain 10 no feto nain 20.

Treinamentu ne'e kobre asuntu sira kona-ba direitu ema nian, kna'ar juis, prokurador, advogadu privadu no defensor públiku, klasifikasaun kazu krime sira no oinsa comunidade sira prosesa kazu krime sira tuir sistema justisa formal.

“JSMP kontinua organiza programa treinamentu ba lideransa komunitariu sira, atu asegura katak nu'udar autóridade lokal sira iha konesimentu natoon, kona-ba setór justisa formal nia funsionamentu no kada instituisaun legal sira nia papel. Ne'e importante atu wainhira comunidade sira hasoru problema justisa, autóridade lokal sira hatene oinsa atu hatudu dalan ba comunidade tuir kazu ida-idak nia natureza no klasifikasaun,” dehan Direitór Ezekutivu JSMP, Luis Oliveira Sampaio.

JSMP observa katak iha áreas rurais balun seidak hetan informasaun kona-ba asesu ba justisa. Tanba ne'e, através hosi programa ne'e JSMP bele fahe informasun kona-ba lei no justisa ba iha comunidade, liu liu ba estrutura suku sira atu nune'e sira bele komprende oinsa rezolve problema kazu hirak ne'e tuir lei ne'ebé vigora iha Timor-Leste.

Xefe Suco Dato Sr. Oscar da Silva hateten katak nia agradese ba ekipa JSMP ne'ebé bele to'o iha sira nia suku hodi fahe informasaun kona-ba justisa formal. Durante ne'e comunidade iha nia suku laran barak mak seidak iha koñesimentu kona-ba setór justisa, liu-liu feto no labarik sira ne'ebé hetan abandona hosi sira nia laen no aman sira. Tanba ne'e, liuhosi oportunidade ne'e, JSMP mós esplika kona-ba lala'ok justisa ba labarik sira ne'ebé mak hetan abandona tuir provizaun kodigu penal nomós kodigu sivíl aplikável.

Xefe Suku mós realsa liutan katak iha feto balun mak hetan oan maibe mane la responsabiliza nune'é feto moris iha terus nia laran tanba laiha informasaun oinsa atu trata direitu ba sira nia an

tuir prosedimentu sivíl relasiona ho podér paternal. Tanba ne'e xefe suku ne'e rekomenda ba JSMP atu kontinua fahe informasaun hanesan tama to'o iha aldeia sira.

Tuir planu, treinamentu hanesan sei realiza iha Distritu Ermera iha fulan ida ne'e. Atividade treinamentu ne'e hetan suporta hosi UNDEF.

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl